

112

Finalmente, sos sardos in s'intentu
sun pro sa limba sarda resessidos,
e sun in assemblea riunidos
omines de cultura e de talentu.

E su primu a leare su foeddu
est'unu casteddaju mustazzudu,
chi alzande sa manu pro saludu
hat cuminzadu:"Seu de Casteddu,
e de accordu cun s'aristanesu
dai tottus is sardus pretendeus
de chistionai in campidanesu
ca est sa mellus lingua chi teneus".

Pesad'unu da s'ateru cuzone
e foeddende a sa logudoresa,
unu punzu iscludendeli a sa mesa
abboghinat:"Ritiradi buffone!

Boisateros de sa capitale
pro seculos nos hazis sottomissu
ma su limbazu, balla, non b'hat male,
menzus m'hazis a bider crozifissu,
che foeddare de cussa manera".
Offesu s'alzat unu trexentinu
a trisinu chi su'e Salighera,
su gadduresu e su maurreddinu.

S'ozastrinu chi su baruniesu
a boghes altas chi parene missos,
non solu nudda nisciunu hat cumpresu
mancu cumpresos si sunu tra issos.

Salzat su nuoresu e cun decoro
narat:"Si semos de Sardigna in mesu,
non Campidanu, mancu Logudoro,
sardos! a faveddamos nugoresu?!

E torra che a prima a tiristrazza
a ingiurgios,ispintas e murrunzos,
che l'han finida a carches e punzos,
a minetas e ispudos in fazza.

E puru sun'istados d'un'idea
cando calmada s'ira a oras tardas
de convocare un'ater'assemblea
pro foeddare de sas limbas sardas .